



## KENYATAAN MEDIA

KEMENTERIAN EKONOMI  
JABATAN PERANGKAAN MALAYSIA

Blok C6 & C7, Kompleks C,  
Pusat Pentadbiran Kerajaan Persekutuan, Presint 1,  
62514, Wilayah Persekutuan Putrajaya  
No. Telefon : 03 - 8090 4681

### PERANGKAAN PEMBUATAN BULANAN, MALAYSIA FEBRUARI 2025

**Jualan sektor Pembuatan mencecah RM153.1 bilion pada  
Februari 2025; tumbuh 4.7 peratus**

**PUTRAJAYA, 11 April 2025** - Nilai jualan sektor Pembuatan meningkat 4.7 peratus (Januari 2025: 3.5%), berjumlah RM153.1 bilion pada Februari 2025. Jabatan Perangkaan Malaysia (DOSM) melaporkan dalam keluaran **Perangkaan Pembuatan Bulanan, Malaysia, Februari 2025** pada hari ini.

Mengulas prestasi jualan Pembuatan terkini, Dato' Sri Dr. Mohd Uzir Mahidin, Ketua Perangkawan Malaysia berkata, "Peningkatan nilai jualan sektor Pembuatan dipacu terutamanya oleh subsektor Makanan, minuman & tembakau yang merekodkan pertumbuhan memberangsangkan 14.6 peratus pada Februari 2025 (Januari 2025: 10.6%). Ini diikuti dengan subsektor Peralatan elektrik & elektronik dan Produk mineral bukan logam, logam asas & produk logam, masing-masing pada 7.7 peratus (Januari 2025: 7.3%) dan 4.4 peratus (Januari 2025: 2.1%). Perbandingan dengan bulan sebelumnya, nilai jualan berkurang sebanyak 3.2 peratus kepada RM153.1 bilion berbanding RM158.1 bilion yang direkodkan pada bulan sebelumnya."

Nilai jualan industri berorientasikan eksport yang mewakili 70.1 peratus daripada jumlah jualan, berkembang 5.9 peratus pada Februari 2025 (Januari 2025: 5.1%). Pengembangan disebabkan terutamanya oleh peningkatan dalam Pembuatan minyak & lemak daripada sayuran & haiwan sebanyak 18.3 peratus (Januari 2025: 11.1%). Selain itu, Pembuatan komputer, produk elektronik & optikal turut meningkat sebanyak 7.8 peratus (Januari 2025: 7.7%), sementara Pembuatan produk getah bertumbuh 8.4 peratus (Januari 2025: 8.9%).

Begitu juga, industri berorientasikan domestik tumbuh sebanyak 2.1 peratus pada Februari 2025, setelah mencatatkan kenaikan marginal 0.1 peratus pada Januari

2025. Prestasi ini disebabkan oleh peningkatan tahun ke tahun dalam Pembuatan produk pemprosesan makanan yang kekal meningkat pada 11.3 peratus (Januari 2025: 10.4%); diikuti dengan Pembuatan produk logam kecuali mesin & kelengkapan (5.5%); dan Pembuatan logam asas (5.2%). Perbandingan bulan ke bulan, kedua-dua industri berorientasikan eksport dan domestik masing-masing susut sebanyak 3.2 peratus dan 3.1 peratus.

Mengulas mengenai bilangan pekerja, Ketua Perangkawan menyatakan, “Seramai 2.39 juta orang terlibat dalam sektor ini pada Februari 2025, bertambah 1.2 peratus (Januari 2025: 0.9%). Pertambahan ini didorong terutamanya oleh subsektor Makanan, minuman & tembakau (2.2%); Produk mineral bukan logam, logam asas & produk logam yang direka (1.7%); dan Peralatan elektrik & elektronik (1.2%). Perbandingan bulan ke bulan, bilangan pekerja dalam sektor ini berkurang 0.1 peratus.

Pada masa yang sama, gaji & upah yang dibayar dalam sektor Pembuatan juga mencatatkan peningkatan 2.0 peratus (Januari 2025: 1.5%), berjumlah RM8.4 bilion pada Februari 2025. Perbandingan bulan ke bulan, gaji & upah yang dibayar susut 0.8 peratus. Seterusnya, nilai jualan bagi setiap pekerja meningkat kepada RM63,961 (3.5%), manakala purata gaji & upah bagi setiap pekerja adalah RM3,513, meningkat 0.8 peratus tahun ke tahun.”

Sepanjang dua bulan pertama tahun ini (Januari – Februari 2025), nilai jualan bagi sektor Pembuatan adalah berjumlah RM311.2 bilion, meningkat sebanyak 4.1 peratus berbanding tempoh yang sama tahun 2024 (Januari – Februari 2024: 1.9%). Bilangan pekerja menokok sebanyak 1.2 peratus kepada 2.39 juta orang, manakala gaji & upah meningkat 1.8 peratus kepada RM16.9 bilion dengan nilai jualan bagi setiap pekerja berjumlah RM130,009, tumbuh 2.9 peratus.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.


OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Embargo: Hanya boleh diterbitkan atau disebarikan mulai jam 1200, Jumaat, 11 April 2025


**Carta 1: Nilai Jualan Sektor Pembuatan, Malaysia  
Februari 2024 - Februari 2025**




**Carta 2: Pertumbuhan Jualan Subsektor Pembuatan, Malaysia,  
Januari dan Februari 2025**



**Carta 3: Nilai Jualan Industri Berorientasikan Eksport dan Domestik bagi  
Sektor Pembuatan, Malaysia, Februari 2024 – Februari 2025**



**Carta 4: Pembuatan Berorientasikan Eksport dan Domestik Mengikut Kumpulan, Januari dan Februari 2025**



Dikeluarkan oleh:

**PEJABAT KETUA PERANGKAWAN MALAYSIA**  
**JABATAN PERANGKAAN MALAYSIA**  
**11 APRIL 2025**